



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./25
Vogošća, 30.05.2025. godine

VIJEĆNIČKA PITANJA
POSTAVLJENA NA 7. REDOVNOJ SJEDNICI OPĆINSKOG VIJEĆA VOGOŠĆA
održanoj 29.05.2025. godine

Vijećnik **Efendić Emir (u ime Kluba vijećnika S BiH)** postavio je slijedeća vijećnička pitanja:

- 7/1.** Postavljam pitanje prema nadležnoj općinskoj službi, da li je odobreno pretvaranje zelene površine u parking prostor u ul. Jošanička, koja se nalazi između dvije zgrade neposredno uz ogradu pomoćnog stadiona „Hakija Mršo“. Ako nije izdato odobrenje, da li su službenici nadležne općinske službe izlazili na lice mjesta i utvrdili ko je izvršio uništavanje zelene površine. Navedena površina je od strane nepoznatih osoba nasuta tamponom i pretvorena u parking prostor na kojem se parkiraju vozila, dok je uništen zeleni pojas između dvije zgrade.
- 7/2.** Postavljam pitanje prema nadležnoj općinskoj službi, da li je zasjedao Štab civilne zaštite Općine Vogošća i šta su konkretno poduzeli na sprječavanju širenja epidemije leptospiroze i potvrđene bruceloze krupne stoke. Koje su konkretno preventivne mjere poduzete iz njihove nadležnosti na sprječavanju širenja epidemije i zarazne bolesti bruceloze koja je potvrđena na farmi koja se nalazi na području općine Vogošća, obzirom da nije blagovremeno izvršena eutanazija zaraženih grla krupne stoke.

Vijećnik **Turković Faruk (u ime Kluba vijećnika SDA)** postavio je slijedeće vijećničko pitanje:

- 7/3.** Pitanje prema KJKP „Rad“, da li su sva domaćinstva u MZ Kobilja Glava dobila individualne kante za odlaganje otpada. Kada će se steći uslovi da budu uklonjene kontejnerske niše kod pasarele na Kobiljoj Glavi, koje se nalaze u neposrednoj blizini kuća i stvaraju neprijatne mirise i divlje deponije.

Vijećnik **Cvrk Ćamil (u ime Kluba vijećnika DF)** postavio je slijedeće vijećničko pitanje:

- 7/4.** Na uglu ulice Tome Mendeša i Igmanske već godinama se nalazi nezavršen objekat. Na ovoj lokaciji odavno nema nikakvih radova, a sam prostor je prilično loše ograđen i prilično ružno izgleda. Prema našim saznanjima lokacija na kojoj se objekat nalazi davno je trebala biti vraćena u prvobitno stanje. Osim što predstavlja problem i potencijalnu opasnost, pogotovo za djecu koja često prolaze pored pomenute lokacije, ona je u posljednje vrijeme i utočište za pse lutalice. Ko je vlasnik parcele na kojoj je objekat započet, ima li namjeru urediti lokaciju i šta općina može preduzeti na rješavanju ovog slučaja. Nemojmo dozvoliti da se desi nekakav nesretni slučaj pa da tek onda reagujemo i tražimo rješenje za ovu lokaciju.

Vijećnik **Gluhović Alija (u ime Kluba vijećnika Naprijed BiH)** postavio je slijedeće vijećničko pitanje:

- 7/5.** Postavljam vijećničko pitanje Općinskom načelniku, ujedno i komandantu Općinskog štaba Civilne zaštite, kao i nadležnoj općinskoj službi da zbog javnosti i informacija vezanih za pojavu bruceloze na području općine Vogošća informišu Vijeće i građane sa poduzetim aktivnostima iz svoje nadležnosti, kao i poduzetim aktivnostima viših nivoa iz njihove nadležnosti sa kojima su upoznati. Planira li Općina u skladu sa svojim mogućnostima i nadležnostima da vlasniku farme pomogne u saniranju štete i nadoknade gubitka.

Vijećnica **Curić Samira (u ime Kluba vijećnika SDP)** postavila je slijedeće vijećničko pitanje:

7/6. Zgrada Općine Vogošća predstavlja ključno administrativno središte u kojem građani svakodnevno ostvaruju svoja prava, pristupaju javnim uslugama i obavljaju različite administrativne poslove. Nažalost, činjenica da ova zgrada još uvijek nije opremljena liftom ozbiljno ograničava pristup osobama s invaliditetom, starijim osobama, trudnicama, roditeljima sa malom djecom, kao i svima koji se suočavaju sa smanjenom pokretljivošću. Zato postavljam pitanje kada Općina planira izgradnju i postavljanje lifta u općinskoj zgradi kako bi osigurala pristupačnost svim građanima, uključujući osobe s invaliditetom. Također, molim da se navede da li su već pokrenuti neki koraci u vezi s projektiranjem, finansiranjem ili planiranjem ovog zahvata i u kojem vremenskom roku se može očekivati realizacija.

Vijećnik **Piknjač Admir (u ime Kluba vijećnika NiP)** postavio je slijedeća vijećnička pitanja:

7/7. Pitam nadležnu općinsku službu da li je predviđena rekonstrukcija i saniranje i da li su upoznati sa postojećim stanjem nadstrešnice u ulici Jošanička ispred objekta JP BH Pošta d.o.o. Sarajevo, prodavnice Konzum, pekare i drugih objekata u istom nizu iz sigurnosnih i bezbjedonosnih razloga po posjetitelje i prolaznike ispod navedene nadstrešnice.

Obrazloženje:

Stanje navedene nadstrešnice je u jako lošem stanju da je pitanje dana kada će doći do urušavanja iste. Tražim od nadležne općinske službe da izađe na teren i utvrdi navedeno stanje nadstrešnice na kojoj je već dobro izraslo drveće, a samim tim može se pretpostaviti u kakvom se stanju nalazi konstrukcija u smislu dostrajalosti iste. Ono što sigurno ne bi bilo dobro da se desi je nedavna situacija u Novom Sadu, gdje je došlo do pada slične nadstrešnice, što je rezultiralo gubitkom ljudskih života i velikim brojem povrijeđenih građana. Ovakvi i slični incidenti jasni su pokazatelji koliko je važno i hitno blagovremeno djelovati u ovakvim situacijama kako bi se izbjegla slična tragedija.

7/8. Pitam nadležnu općinsku službu da li je predviđena zamjena saobraćajnog ogledala u ulici Dumača, MZ Hotonj.

Obrazloženje:

Saobraćajno ogledalo u ulici Dumača, MZ Hotonj je već duži vremenski period nažalost razbijeno i građani opravdano traže zamjenu i popravak istog, jer se dovodi u pitanje sigurnost vozača i pješaka u ovom dijelu ulice.

Vijećnica **Karović Amraa (u ime Kluba vijećnika SDP)** postavila je slijedeće vijećničko pitanje:

7/9. U kojoj fazi se nalazi rekonstrukcija puta prema osnovnoj školi u Hotonju i do kada će radovi trajati, odnosno zašto već duži period stagnira obnova i rekonstrukcija tog dijela.

Obrazloženje:

Obzirom da taj put vodi prema osnovnoj školi djeca su prinuđena ići nekim zaobilaznim putevima. Stvara se veća gužva, vozila i pješaci prave gužvu kao i mini busevi koji dovoze učenike. Molim nadležne da nam daju opravdan odgovor.

Vijećnik **Pašagić Almir (u ime Kluba vijećnika SDP)** postavio je slijedeća vijećnička pitanja:

7/10. Kada će se rekonstruisati područje pijace Vogošća.

Obrazloženje:

Građani Vogoše pitaju da li je urađen projekat stambeno-poslovnog objekta sa gradskom tržnicom u prizemlju na prostoru sadašnje pijace i ako jeste zbog čega se čeka na realizaciju, jer postoje privatni investitori koji bi želili da ovaj zapušteni dio pretvore u jedan gradski centar.

7/11. Zašto nije postavljena zaštitna ograda na fontani Trga žrtava genocida Srebrenica.

Obrazloženje:

Na Trgu žrtava genocida Srebrenica veliki broj djece se igra u parku oko fontane na kojoj nije postavljena zaštitna ograda, a kako postoji kanal oko same fontane često se dešava da djeca padnu u kanal i povrijede se. Građani traže hitno postavljanje zaštitne ograde na navedenom području.

Vijećnik **Gljiva Eno (u ime Kluba vijećnika DF)** postavio je slijedeće vijećničko pitanje:

- 7/12.** U ime stanovnika naselja Donja Vogošća, postavljam pitanje u kojoj fazi se nalazi rješavanje problema vodovodne infrastrukture u ovom naselju i postoji li konkretan plan za njegovo trajno rješenje? Stanovnici Donje Vogošće već duže vrijeme suočavaju se s ozbiljnim problemima u vezi sa snabdijevanjem pitkom vodom. Ova situacija utiče na osnovne uslove života, higijenu i svakodnevno funkcionisanje građana. S obzirom na to da se radi o pitanju osnovne komunalne infrastrukture, molimo vas za informaciju o trenutnom stanju i budućim koracima i planovima.

Vijećnik **Mehić Almedin (u ime Kluba vijećnika SDA)** postavio je slijedeće vijećničko pitanje:

- 7/13.** Postavljam pitanje prema nadležnim o završetku radova u ulici Donji Hotonj pored OŠ „Izet Šabić“, odnosno ulica koja je na spoju ulica Ramiza Alića i Magistralnog puta M18.

Obrazloženje:

Svjedočimo da su radovi na sanaciji, odnosno rekonstrukciji pomenute ulice potrajali dugo, te se trenutno lokacija nalazi u jako lošem stanju i ometa dolazak, odnosno kretanje učenika i osoblja prema OŠ „Izet Šabić“. Postavljam pitanje prema nadležnim kada se očekuje završetak radova i konačno puštanje ulice u promet.

Vijećnik **Omerović Denis (u ime Kluba vijećnika SDP)** postavio je slijedeća vijećnička pitanja:

- 7/14.** Shodno inicijativi koju sam uputio na 3. redovnoj sjednici Općinskog vijeća, a za postavljanje usporivača brzine tzv. ležećih policajaca u ulici Igmanska, koja se proteže od slastičarne „Park“ do samog uključenja na kružni tok kod hotela „Sunce“, a paralelno uz Magistralni put M-18, te odgovor koji sam dobio – da je to krajnja mjera, te da je opština poslala dopis da se vrši kontrola brzine i poduzmu aktivnosti na poboljšanju u sigurnosti saobraćaja u navedenoj ulici postavljam slijedeće pitanje na zahtjev zabrinutih građana Policijskoj upravi Vogošća. Da li su utvrdili i sankcionisali svakodnevne prekršaje, od preticanja kolone iz ulice Akifa ef. Biserovića, a kako bi se prije semfara uključili u navedenu ulicu Igmanska, do neprilagođene brzine kroz istu. Da li Policijska uprava Vogošća smatra da je opravdano i potrebno postaviti usporivače brzine tzv. ležeće policajce.
- 7/15.** S obzirom da je odgovor na pitanje postavljeno na 3. redovnoj sjednici Općinskog vijeća izostao, upućujem isto pitanje, a to je da li je JU „ Kulturno – sportski centar“ Vogošća preuzela na sebe upravljanje fudbalskim stadionom „Hakija Mršo“ , te da li drugi nogometni i malonogometni klubovi, pored FK Unis, a koji dolaze sa područja općine mogu da koriste isti.

Vijećnik **Gljiva Bego (u ime Kluba vijećnika S BiH)** postavio je slijedeće vijećničko pitanje:

- 7/16.** Pitanje prema JU „Kulturno-sportski centar“ Vogošća. Molimo da nam dostavite informaciju da li postoji plan JU „Kulturno-sportski centar“ Vogošća u vezi sa obnovom, redovnim održavanjem i odgovornim korištenjem pomoćnog stadiona Hakija Mršo s obzirom na njegovo trenutno stanje i dotrajalu infrastrukturu. Da li se planira sanacija objekta, uređenje zelenih površina, te jasno definisanje namjene i pravila korištenja ovog sportskog prostora. Kao sto nam je svima poznato većina nogometnih, malonogometnih, atletskih i drugih klubova usmjereni su na korištenje glavnog stadiona, te u tom pogledu pomoćni stadion bi bio idealno rješenje u cilju obezbjeđenja jednakih uslova za sve klubove. Pomoćni stadion predstavlja vrijedan javni prostor koji bi trebao služiti prvenstveno sportskim klubovima, kao i rekreativnim aktivnostima građana. Međutim, trenutno se nalazi u vidno lošem stanju, travnjak je zapušten, a infrastruktura dotrajala. Ovakvo stanje ne samo da umanjuje vrijednost prostora nego šalje i lošu sliku navedenog sportskog prostora. Vidljivo je da je dio prostora otvoren i koristi se parking. Smatram da je nužno preispitati trenutni status pomoćnog stadiona i poduzeti korake kako bi se ovaj prostor relativizirao i stavio u funkciju na način koji odgovara njegovoj stvarnoj namjeni.

Vijećnik **Hebib Armin (u ime Kluba vijećnika SDP)** postavio je slijedeća vijećnička pitanja:

7/17. Da li Općina Vogošća trenutno ima aktivan program koji omogućava dodjelu općinskog (državnog) zemljišta bez naknade za poljoprivrednu proizvodnju ?

Obrazloženje:

Podsjećam da je Općina Vogošća tokom 2020. godine, kao odgovor na tadašnje okolnosti i potrebe građana, provela program kojim je omogućena dodjela općinskog zemljišta bez naknade osobama zainteresiranim za poljoprivrednu proizvodnju. Tada su lokaliteti Rosulje i Gornja Jošanica stavljeni na raspolaganje građanima za potrebe proljetne sjetve. Program je podržan i odgovarajućim zaključkom Općinskog vijeća, čiji je cilj bio da se građanima bez vlastitih parcela omogući privremeno korištenje zemljišta za uzgoj hrane i druge poljoprivredne aktivnosti. Međutim, prema informacijama sa zvanične web stranice Općine Vogošća, najnoviji javni poziv iz aprila 2025. godine odnosi se isključivo na sufinansiranje troškova nabavke repromaterijala za proljetnu sjetvu, bez spominjanja mogućnosti dodjele zemljišta. S obzirom na to, molim vas da odgovorite:

- Da li Općina trenutno provodi ili planira provesti program dodjele zemljišta bez naknade za poljoprivrednu proizvodnju?
- Ako program nije aktivan, da li postoji mogućnost njegovog ponovnog pokretanja, imajući u vidu interes građana i aktuelne ekonomske izazove?

Unaprijed zahvaljujem na dostavljenim informacijama i nadam se da će se ovakvi programi, koji doprinose održivom razvoju i podršci građanima i dalje podržavati kroz konkretne mjere.

7/18. Da li su nadležne službe Općine Vogošća kontaktirale Veterinarsku stanicu "Novi Grad" d.o.o. Sarajevo, s kojom postoji okvirni sporazum o saradnji, povodom sve učestalijih pojava pasa litalica i napuštenih pasa na području naše općine?

Obrazloženje:

Na teritoriji Općine Vogošća u posljednjem periodu primijećen je znatan porast broja pasa litalica, što izaziva zabrinutost kod građana, posebno u zonama gdje se nalaze škole, dječija igrališta i naseljena područja. Građani redovno prijavljuju incidente i objavljuju video zapise na društvenim mrežama koji prikazuju pse litalice u neposrednoj blizini škola i igrališta, konkretno u ulici Braće Kršo, ali i ranije u ulicama Vogošćanskih odreda i Feriza Merzuke. Svaki pas bez nadzora može predstavljati potencijalnu opasnost, kako za fizičku sigurnost građana, tako i u smislu prenosa zaraznih bolesti. Istovremeno, životinje u ovakvom stanju često pate i nalaze se u lošim uslovima, zbog čega je hitno djelovanje neophodno i s aspekta zaštite životinja. S obzirom da Općina Vogošća ima zaključen okvirni sporazum sa Veterinarskom stanicom "Novi Grad" d.o.o. Sarajevo, kojom je obuhvaćeno pružanje usluga hvatanja, zbrinjavanja, kastracije, sterilizacije, liječenja, udomljavanja i eutanazije pasa litalica, molim da se dostavi informacija:

- Da li su službe Općine preduzele aktivnosti prema Veterinarskoj stanici?
- Ako jesu, koje konkretne mjere su dogovorene i u kojoj fazi je njihova realizacija?

Unaprijed zahvaljujem na odgovoru i nadam se da će nadležne službe promptno djelovati u interesu sigurnosti građana i zaštite životinja.

Vijećnik **Turković Faruk (u ime Kluba vijećnika SDA)** postavio je slijedeće vijećničko pitanje:

7/19. Pitanje prema Direkciji BH Telecoma Sarajevo. Koliko naseljenih mjesta na području općine Vogošća trenutno nema stabilan mobilni signal ili ga uopće nema.

Vijećnik **Bogilović Enis (u ime Kluba vijećnika NiP)** postavio je slijedeće vijećničko pitanje:

7/20. Da li je planirana sanacija raskrsnice Kobilja Glava kod Mjesne zajednice, prema Magistralnom putu M17.

Dostaviti:

1. Naslovu
2. a/a

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./25
Vogošća, 30.05.2025. godine

INICIJATIVE POKRENUTE
NA 7. REDOVNOJ SJEDNICI OPĆINSKOG VIJEĆA VOGOŠĆA
održanoj 29.05.2025. godine

Na 7. redovnoj sjednici Općinskog vijeća vijećnik **Efendić Emir (u ime Kluba vijećnika S BiH)** pokrenuo je slijedeće inicijative:

- 7/2.** Pokrećem inicijativu za čišćenje i deratizaciju korita rijeke Vogošće od donjeg mosta kod Srednjoškolskog centra do mosta u naselju Uglješići.

Obrazloženje:

Od samog početka učestvovanja u radu Općinskog vijeća, ispred Kluba vijećnika S BiH postavljeno je pitanje, a i problematizirana situacija oko čišćenja korita rijeke Vogošće, koje je prilično zapušteno zbog izrasle trave i niskog rastinja. Navedena situacija pogoduje nakupljanju raznog otpada, razmnožavanju gmizavaca i štakora, što može ugroziti zdravlje ljudi. Korito rijeke Vogošće se proteže kroz najurbaniji dio Vogošće, gdje se nalaze važni objekti, kao što su škole, obdaništa, stambene zgrade, sportski tereni i dvorana. U Kantonu Sarajevo je proglašena epidemija leptospiroze, a korito rijeke Vogošće u ovakvom stanju je pogodno za nastanak i širenje epidemije, stoga je potrebno izvršiti čišćenje i deratizaciju istog.

- 7/3.** Pokrećem inicijativu za izgradnju pješačkog mosta preko korita rijeke Vogošće u ul. Uglješići koji bi povezao navedenu ulicu sa naseljem u ul. Omladinska, te na navedenom dijelu omogućio pješački prilaz dvorani „Amel Bečković“ i OŠ „Zahid Baručija“.

Obrazloženje:

Naime, na koritu rijeke Vogošće od WOG centra, do mosta u naselju Uglješići ne postoji mogućnost prelaska navedenog riječnog korita. S tim u vezi, potrebno je u neposrednoj blizini dvorane „Amel Bečković“ sagraditi pješački most, kako bi bile povezane lijeva i desna obala korita rijeke na navedenoj lokaciji. Navedena dionica je prilično duga, bez mogućnosti prelaska sa jedne na drugu stranu obale. Izgradnjom pješačkog mosta bi se građanima i djeci naselja Donja Jošanica, Uglješići i naselja u ul. Omladinska, olakšala međusobna komunikacija, kao i komunikacija prema OŠ „Zahid Baručija“, sportskoj dvorani „Amel Bečković“ i stadionu „Hakija Mršo“.

Vijećnik **Turković Faruk (u ime Kluba vijećnika SDA)** pokrenuo je slijedeću inicijativu:

- 7/4.** Pokrećem inicijativu prema Ministarstvu komunalne privrede Kantona Sarajevo i KJKP „RAD“ sa zahtjevom za hitno proširenje gradske deponije Smiljevići, u dijelu namijenjenom za odlaganje animalnog otpada, radi poštivanja Zakona o zaštiti stanovništva od zaraznih bolesti Federacije BiH.

Obrazloženje:

Na području Općine Vogošća evidentirani su slučajevi bruceloze. Nadležne veterinarske službe nisu provele zakonsku proceduru eutanazije i zakopavanja zaraženih životinja na za to predviđenoj lokaciji. Potrebno je proširiti deponiju kako bi se osigurali sanitarni uslovi i zaštitilo zdravlje stanovništva.

Vijećnik **Cvrk Čamil (u ime Kluba vijećnika DF)** pokrenuo je slijedeću inicijativu:

7/5. Pokrećem inicijativu za rekonstrukciju i uređenje ulice Braće Halać.

Obrazloženje:

Pokrećem inicijativu za rekonstrukciju i sveobuhvatno uređenje ulice Braće Halać u općini Vogošća, s ciljem poboljšanja uslova života stanovnika ove ulice i rješavanja dugogodišnjih infrastrukturnih problema, uključujući:

- rekonstrukciju kolovoza i trotoara,
- uređenje i proširenje postojećih ili formiranje novih parking površina,
- sanaciju slivnika i rješavanje oborinskih voda,
- postavljanje odgovarajuće signalizacije i javne rasvjete gdje nedostaje.

Ovim projektom značajno podigao kvalitet života građana i unaprijedila ukupna slika naše općine.

Vijećnica **Curić Samira (u ime Kluba vijećnika SDP)** pokrenula je slijedeće inicijative:

7/6. Pokrećem inicijativu za uređenje općinskog zemljišta u ulici Rašida Bešlije (Hotonj), u neposrednoj blizini marketa Best.

Obrazloženje:

Na navedenoj lokaciji u ulici Rašida Bešlije u naselju Hotonj, u neposrednoj blizini marketa Best, nalazi se općinsko zemljište koje trenutno predstavlja sigurnosni rizik za građane – riječ je o neuređenom terenu s velikom rupom koja predstavlja ozbiljnu opasnost, naročito za djecu. U zgradi koja se nalazi u neposrednoj blizini živi veliki broj djece, te ovakvo stanje terena dodatno pojačava zabrinutost roditelja i stanara. Smatram da bi se navedeni prostor mogao kvalitetno iskoristiti i urediti u funkcionalan i siguran kutak za zajednicu. Stoga predlažem:

1. Da se izvrši hitna procjena sigurnosne situacije i sanacija rupe na općinskom zemljištu.
2. Da se razmotri mogućnost uređenja tog prostora u vidu postavljanja klupe, manjeg igrališta ili druge sadržaje prilagođene djeci i porodicama koje žive u okolini.
3. Da nadležne službe, u saradnji sa Savjetom MZ Hotonj, naprave plan uređenja prostora uz poštivanje sigurnosnih i estetskih standarda.

Ova inicijativa ima za cilj povećanje sigurnosti građana, posebno djece, te doprinosi boljoj urbanoj infrastrukturi i kvalitetu života u naselju.

7/7. Pokrećem inicijativu za uvođenje higijenskih ormarića sa neophodnim higijenskim potrepštinama za djevojčice u osnovnim školama.

Obrazloženje:

S obzirom na činjenicu da srednje škole na području Kantona Sarajevo već imaju osigurane higijenske ormariće sa neophodnim higijenskim potrepštinama za djevojčice tokom menstrualnog ciklusa, smatram da je važno da i osnovne škole prate ovaj primjer. Menstrualni ciklus je prirodan dio odrastanja svake djevojčice, a prva iskustva s njom nerijetko se dešavaju upravo tokom osnovnoškolskog obrazovanja. Nažalost, mnoge djevojčice se tada osjećaju nesigurno, nepripremljeno i neugodno, posebno ako nemaju pristup osnovnim higijenskim potrepštinama u školi. Uvođenjem higijenskih ormarića sa ulošcima i drugim neophodnim sredstvima u osnovne škole pružili bi smo konkretan vid podrške djevojčicama, doprinjeli njihovom samopouzdanju i osigurali dostojanstvene higijenske uslove u obrazovnim ustanovama. Ova inicijativa ne iziskuje velika finansijska sredstva, a ima veliki značaj za zdravlje, sigurnost i psihosocijalni razvoj djevojčica. Stoga predlažem:

1. Da se sve osnovne škole na području općine Vogošća obavežu da osiguraju higijenske ormariće sa ulošcima i drugim osnovnim sredstvima za menstrualnu higijenu.
2. Da nadležne službe u saradnji sa školama naprave plan implementacije ove mjere i osiguraju minimalna sredstva potrebna za početak realizacije.

Očekujem da će ova inicijativa biti ozbiljno razmotrena i podržana, u interesu zdravlja i dobrobiti djevojčica u našem obrazovnom sistemu.

Vijećnik **Glijiva Avdo (u ime Kluba vijećnika DF)** pokrenuo je slijedeće inicijative:

7/8. Pokrećem inicijativu za obnovu dječijeg igrališta preko puta vrtića „Ljiljani“ u Vogošći.

Obrazloženje:

Pokrećem inicijativu za obnovu dječijeg igrališta koje se nalazi preko puta vrtića „Ljiljani“ u Vogošći. Ova lokacija predstavlja važan prostor za igru i okupljanje djece, ali je igralište potrebno obnoviti, osigurati i prilagoditi standardima sigurnosti djece. S obzirom na blizinu odgojno-obrazovne ustanove i frekventnost korištenja, smatram da ovo igralište treba rekonstrukciju i dodatno uređenje:

- postavljanje novih i sigurnih sprava
- uređenje podloge koja je oštećena i uređenje zelene površine.

- 7/9.** Postavljanje zaštitne ograde-bankine u naselju Svrake – lokalitet Ravne, preko puta kućnog broja 6.

Obrazloženje:

Na pomenutoj lokaciji nedavno je uklonjeno drveće koje je do tada služilo kao prirodna prepreka pri mogućem izljetanju vozila s kolovoza. Uklanjanjem drveća otvoren je slobodan pad niz padinu, a odmah ispod nalazi se korito rijeke Bosne. U slučaju saobraćajne nezgode, izostanak bilo kakve fizičke zaštite (bankine) može dovesti do teških posljedica, uključujući i gubitak života. U cilju prevencije nesreća i povećanja bezbjednosti svih učesnika u saobraćaju, smatramo da je hitno i neophodno postavljanje zaštitne ograde- bankine duž ovog dijela puta.

Vijećnica **Salčin Sabiha (u ime Kluba vijećnika SDA)** pokrenula je slijedeću inicijativu:

- 7/10.** Pokrećem inicijativu prema nadležnom Ministarstvu i Direkciji za puteve KS da se sanira i propisno obilježi kružni tok Krivoglavci.

Obrazloženje:

Svjesni činjenice da kroz kružni tok Krivoglavci svakodnevno saobraća veliki broj vozila, te da se na mjestu ovog kružnog toka svakodnevno stvaraju velike gužve, potrebno je što hitnije sanirati ovaj kružni tok koji je prepun ispućenja i pukotina na asfaltu, što otežava saobraćaj na ovom mjestu. Isto tako potrebno je za ovaj kružni tok postaviti horizontalnu saobraćajnu signalizaciju u skladu sa pravilima i propisima. Molim vas da se što hitnije pristupi rješavanju ovog problema.

- 7/11.** Pokrećem inicijativu prema nadležnoj općinskoj službi, Savjetima MZ, da se na području naše općine urade oglasne ploče, te da one koje su dotrajale zamjene novim pločama.

Obrazloženje:

Na području općine Vogošća, egzistira više oglasnih ploča koji imaju svoju svrhu i ulogu, nažalost većina njih je u jako lošem stanju, često nemarom samih sugrađana uništena, išarana i polomljena. Dok u našu općinu ne uvedemo savremene led oglasne ploče, iniciram prema nadležnoj Općinskoj službi da iste uredi, očisti, ofarba te zamjeni one koje su dotrajale.

Vijećnik **Piknjač Admir (u ime Kluba vijećnika NiP)** pokrenuo je slijedeće inicijative:

- 7/12.** Pokrećem inicijativu za proširenje prostornog kapaciteta objekta u kojem se nalazi pošta u ulici Jošanička u općini Vogošća.

Obrazloženje:

Pokrećem inicijativu za proširenje prostornog kapaciteta pošte ili dogradnju novog prostornog dijela koji će omogućiti primanje pritigle brze pošte. Svjedoci smo na trend rasta online narudžbi, kao i sve većeg broja pošiljaka, odnosno veličine gabarita pošiljaka i poštansko poslovanje se suočava sa problemom prijema i isporuke navedenih pošiljaka putem brze pošte. Proširenjem kapaciteta postojećeg objekta pošte ili otvaranjem i izgradnjom nove pošte u našoj općini stvorili bi se uslovi da građani i uposlenici pošte imaju brži i efikasniji pristup svojim pošiljkama, što će smanjiti gužve i vrijeme čekanja. Trenutno stanje često dovodi do pretrpanosti postojećeg objekta, oštećenjem pošiljaka, gužve na ulazu u poštu, nezadovoljstvo građana. Ukoliko nadležna služba nije u mogućnosti realizacije ove inicijative, predlažem da istu proslijedi nadležnima i JP BiH Pošta d.o.o. Sarajevo.

- 7/13.** Pokrećem inicijativu za postavljanje kontejnera za odvoz smeća u naseljima koja nisu obuhvaćena za odvoz smeća i u kojima nisu podijeljene kante za odlaganje smeća.

Obrazloženje:

Putem ove inicijative za postavljanje kontejnera za odvoz smeća u naseljima kao što je naselje Kremeš i Bradići, a i u drugim naseljima u kojima nije regulisano odlaganje i odvoz smeća, niti podjela kanti, navest ću razloge zbog opravdanosti usvajanja inicijative. Nedostatak kontejnera i mogućnosti odlaganja smeća dovodi do nakupljanja smeća na ulicama ispred zgrada gdje su postavljeni kontejneri za stanare tih zgrada, a stanovnici navedenih naselja odlažu smeće u tim kontejnerima iz razloga što nemaju gdje drugo, odnosno nije regulisano prikupljanje i odvoz smeća u navedenim naseljima. Također, rasipanje i nakupljanje smeća na ulicama dovodi do pojave zaraze. Rasute namirnice privlače štetočine i stvara se veliki rizik po zdravlje stanovnika i ružna slika naše općine. Kontejneri za odlaganje smeća trebaju biti na pristupačnim mjestima, odnosno na izlazu iz navedenih naselja, te nesmetan i adekvatan pristup kamionima za odvoz smeća. Postavljanjem kontejnera postićemo pravilno odlaganje smeća, smanjujemo ilegalno odlaganje smeća, odnosno bacanje smeća iz automobila u prirodu (žbunje, šume, livade,

potoke, rijeke i dr.). Ova inicijativa ima podršku većeg broja stanovnika navedenih naselja koji su izrazili nezadovoljstvo i zabrinutost zbog trenutne situacije, odnosno nije regulisano odlaganje i odvoz smeća.

Vijećnica **Karović Amra (u ime Kluba vijećnika SDP)** pokrenula je slijedeće inicijative:

- 7/14.** Pokrećem inicijativu da se izvrši rekonstrukcija i obnova dijela puta koji se nalazi na mjestu uključenja prema naselju Rosulje iz pravca glavnog grada.

Obrazloženje:

Na tom spomenutom dijelu dionice asfalt je propao, vozila se otežano i usporeno kreću, zbog frekvencije vozila i nedostatka signalizacije i zbog oštećenja propalog asfalta. Na dionici se nalazi mali dio sa zelenom površinom, koji izgleda zapušteno, na ulici uz trotoare na skretanju nalazi se mnogo pijeska kao ostatka iz zimskog perioda. Ulaz i izlaz u naš grad Vogošću treba i mora da bude ogledalo grada i ljudi koji tu žive. Ulaz i izlaz iz Vogošće krase kružni tokovi koji moraju biti uvijek uređeni sa ošišanom travom i zasađenim cvijećem. Svakom strancu ili nekom iz drugog dijela Bosne i Hercegovine kada ulazi u grad prvo što upada u oči je uređenje i izgled tog mjesta. Molim nadležne službe da pozitivno odgovore u cilju poboljšanja uslova života u Vogošći. U prilogu dostavljam fotografije.

- 7/15.** Pokrećem inicijativu da se izvrši postavljanje table sa natpisom Rosulje na ulasku u Vogošću, odmah poslije kružnog toka i benzinske pumpe Energopetrol.

Obrazloženje:

Na tom spomenutom dijelu nedostaje adekvatna obavijest ili table sa nazivom mjesta koje se nalazi u samoj blizini. Postavljanjem table olakšava se nalaženje istog mjesta. Učesnici u saobraćaju lakše se snalaze i brže nalaze i dolaze do istog. Samim tim, pravi se manja gužva na cesti, jer ljudi ne lutaju. U svakom naselju treba da stoje table sa nazivima glavnih ulica i također važnih ustanova. U prilogu dostavljam fotografije. Molim nadležne službe da blagovremeno odgovore i uvjere se u opravdanost iste inicijative.

Vijećnica **Šabić Dalia (u ime Kluba vijećnika DF)** pokrenula je slijedeće inicijative:

- 7/16.** Pokrećem inicijativu za sveobuhvatno čišćenje rastinja, grmlja i niskog rastinja u okviru ljetnog održavanja na području cijele općine Vogošća

Obrazloženje:

Pokrećem inicijativu da se u okviru ljetnog komunalnog održavanja organizuje sveobuhvatna akcija čišćenja obraslog rastinja, niskog rastinja i grmlja na području cijele općine Vogošća.

Kao ilustrativni primjeri ističem:

- ulica Gornja Džreškovca kod broja 32A, gdje je saobraćajno ogledalo zaklonjeno rastinjem,
- područje oko Likvala, gdje rastinje onemogućava normalno kretanje vozila i pješaka.

Međutim, napominjemo da se ovakvi i slični slučajevi nalaze širom općine te se apeluje da se aktivnost provede na cijeloj teritoriji općine, a ne samo na pojedinačnim lokacijama. Neodržavano rastinje ne samo da ugrožava bezbjednost saobraćaja (ograničava preglednost, zaklanja saobraćajne znakove i ogledala), već stvara i idealne uslove za pojavu glodara, naročito pacova. S obzirom na nedavne slučajeve pojave pacova i širenje bolesti Leptospiroza u Sarajevu, blagovremeno čišćenje zelenih površina, uklanjanje otpada i slične mjere doprinose prevenciji zaraznih bolesti i zaštiti javnog zdravlja.

- 7/17.** Pokrećem inicijativu prema JP Ceste Federacije BiH da se na ulazu u novoootvoreni krak prema Osnovnoj školi "Izet Šabić" u naselju Hotonj postavi putokazna tabla sa jasno naznačenim smjerovima ka:

- Osnovnoj školi „Izet Šabić“
- Ambulanti Hotonj
- Džamiji Hotonj.

Putokazna tabla bi značajno olakšala orijentaciju, poboljšala sigurnost u saobraćaju te doprinijela boljoj preglednosti i organizaciji prometa na ovoj dionici.

Vijećnica **Briga Sanela (u ime Kluba vijećnika SDA)** pokrenula je slijedeću inicijativu:

- 7/18.** Pokrećem inicijativu prema Elektro distribuciji Sarajevo da izvrši neophodne aktivnosti, s ciljem povećanja napona električne energije u naselju Blagovac, Grab, Rosulje i Tihovići.

Obrazloženje:

Na području MZ Blagovac već duži vremenski period dolazi do čestih prekida isporuke električne energije. Rezultat toga je sve veći broj privrednih subjekata na području ove mjesne zajednice, zbog

čega dolazi do značajnog smanjenja napona, kao i učestalim nestankom električne energije, posebno u zimskom periodu i usljed vremenskih nepogoda. Također, nisko naponski dalekovodi prema Blagovcu, Tihovićima i Grabu su još uvijek izolirani vodovi, iako je po planu Elektrodistribuciji Sarajevo isto trebalo biti završeno 2022. godine.

Vijećnik **Škoro Hamdija (u ime Kluba vijećnika Naprijed BiH)** pokrenuo je slijedeće inicijative:

7/19. Pokrećem inicijativu za postavljanje usporivača brzine u ulici Braće Kršo od broja 1. do kraja ulice odnosno autobuske stanice.

Obrazloženje:

Stanovnici ove ulice svaki dan svjedoče brzom i neodgovornoj vožnji nesavjesnih vozača koji ugrožavaju sigurnost pješaka i ostalih učesnika u saobraćaju.

7/20. Pokrećem inicijativu za zamjenu sijalice javne rasvjete koja se nalazi na ulazu u ulicu Braće Halać, preko puta Općine.

Obrazloženje:

Pomenuta sijalica javne rasvjete već duži vremenski period nije u funkciji.

Vijećnik **Pašagić Almir (u ime Kluba vijećnika SDP)** pokrenuo je slijedeće inicijative:

7/21. Pokrećem inicijativu za postavljanje kamera na pješačkom prelazu između DZ Vogošća, Policijske stanice Vogošća i Općine Vogošća.

Obrazloženje:

S obzirom da je jedan od najfrekventnijih pješačkih prelaza između DZ Vogošća, Policijske stanice Vogošća i Općine Vogošća, a ujedno se nalazi i skretnica za prilaz Domu zdravlja, isti predstavlja opasnost za povrede pješaka i saobraćajnih nesreća. Statistika iz predhodnih godina nas upozorava da se baš na tom prostoru dogodio veliki broj saobraćajnih nesreća kao i povrede pješaka. Također nije postavljen ni znak da postoji pješački prelaz kada se dolazi iz pravca Tuzle prema Sarajevu. Inicijativu je potrebno dostaviti Ministarstvu saobraćaja Kantona Sarajevo.

7/22. Pokrećem inicijativu za regulisanje parking prostora ispred Doma zdravlja Vogošća.

Obrazloženje:

Na prostoru oko Doma zdravlja Vogošća veliki broj građana parkira auta na ulicu ispred Doma zdravlja gdje je zabranjeno parkiranje, a time spriječavaju prilaze sanitetima Hitne pomoći i Doma zdravlja Vogošća. Iza Doma zdravlja se nalazi parking koji bi svojim proširenjem trebao biti za automobile uposlenika Doma zdravlja Vogošća, a proširenje parking prostora ispred Apoteke Vogošća i parkinga uz Jošanički potok bi bio parking za pacijente. Realizacijom ove inicijative bi se regulisala stalna gužva automobila ispred ulaza u Hitnu pomoć i Doma zdravlja Vogošća. Inicijativu je potrebno dostaviti Ministarstvu saobraćaja Kantona Sarajevo.

Vijećnik **Glija Eno (u ime Kluba vijećnika DF)** pokrenuo je slijedeću inicijativu:

7/23. Pokrećem inicijativu za informisanje i upozoravanje građana i klaonika o pravilnom odlaganju animalnog otpada povodom Kurban-bajrama.

Obrazloženje:

Pokrećem inicijativu da Općina Vogošća, u saradnji s nadležnim komunalnim preduzećima, inspeksijskim službama i veterinarskom inspekcijom, blagovremeno uputi javno upozorenje i smjernice svim građanima, legalnim i nelegalnim klaoničarima, povodom predstojećeg Kurban-bajrama, kako bi se spriječile štetne posljedice nepropisnog odlaganja animalnog otpada. Potrebno je posebno naglasiti da je zabranjeno bacanje animalnog otpada (kože, crijeva, kostiju, rogova, krvi, i slično) u kanalizaciju, na javne površine ili druga mjesta koja nisu za to predviđena. Podsjećamo da je dozvoljeno odlaganje samo na posebno određena mjesta, ili zakopavanje otpada na lokacijama udaljenim od izvora podzemnih voda, uz obavezno prekrivanje slojem zemlje. Za dezinfekciju površina mogu se koristiti specijalizirana sredstva, ali i otopine živog ili gašenog kreča, te drveni lug. Upozorenje treba uključivati i informaciju da će općinske službe, zajedno s kantonalnom inspekcijom, vršiti pojačani nadzor u dane Bajrama kako bi se sankcionisalo nepropisno odlaganje animalnog otpada, jer smo prethodnih godina imali slučajeve začepjenja kanalizacije, širenja neugodnih mirisa, kao i opasnost od zaraznih bolesti. Ova mjera je u funkciji zaštite javnog zdravlja, očuvanja okoliša i održavanja higijene tokom vjerskih praznika i treba biti redovna praksa.

Vijećnik **Mehić Almedin (u ime Kluba vijećnika SDA)** pokrenuo je slijedeće inicijative:

7/24. Pokrećem inicijativu prema nadležnoj službi općine Vogošća da se izvrši sanacija dječijeg igrališta u ulici Kenana Brkanića do broja 57. na tzv „Košu“.

Obrazloženje:

Sportsko igralište koje sadrži teren za mali nogomet i košarku, koji koriste stanovnici naselja Kobilja Glava, trenutno se nalazi u prilično lošem stanju. Na igralištu se svakodnevno druže naša djeca svih uzrasta te pokrećem inicijativu koja bi se mogla realizovati u dvije faze i to:

I. Faza

Potrebno je zamijeniti mreže na golovima i košu. Postaviti kantu (korpu) za otpatke, ofarbati navedene rekvizite, te igralište uvrstiti u redovno održavanje.

II. Faza

Kada se steknu finansijski uslovi postaviti rasvjetu (reflektore) i video nadzor, postaviti iza golova zaštitne mreže, te postaviti nekoliko rezervnih klupa, odnosno klupa za odmor građana. Električno napajanje reflektora i video nadzora može se koristiti sa stubova rasvjete uz dogovor sa nadležnim.

Vijećnik **Omerović Denis (u ime Kluba vijećnika SDP)** pokrenuo je slijedeće inicijative:

7/25. Pokrećem inicijativu nadležnim službama za asfaltiranje kraka ulice Stara cesta, od broja 60. do 65.

Obrazloženje:

U ime i na zahtjev mještana dijela ulice Stara cesta, od broja 60. do 65., pokrećem inicijativu za asfaltiranje pomenutog kraka koji je trenutno neasfaltiran, pun rupa, prašine i blata, što otežava svakodnevni život. U više navrata put je privremeno nasipan tamponom, najčešće uz obećanja o asfaltiranju, koja do danas nisu ispunjena. Građani se nadaju da će općina imati razumijevanja i da će ovaj problem konačno biti trajno riješen. U prilogu dostavljamo i kartu sa jasno označenom lokacijom o kojem kraku je riječ.

7/26. Pokrećem inicijativu nadležnim organima za postavljanje saobraćajnog ogledala kod podvožnjaka u ulici Nova željeznička stanica.

Obrazloženje:

Na zahtjev mještana ulice Nova željeznička stanica pokrećem inicijativu za postavljanje saobraćajnog ogledala kod podvožnjaka u ovoj ulici i to na dijelu kada se sa Magistralnog puta M – 18 ulazi u navedenu ulicu. Podvožnjak je sam po sebi izuzetno nepregledan i uzak, što otežava vidljivost, te bi ogledalo značajno doprinijelo boljoj preglednosti i sigurnosti svih učesnika u saobraćaju. Molim nadležne službe da razmotre ovaj prijedlog i omoguće postavljanje ogledala u cilju povećanja bezbjednosti.

Vijećnik **Glija Bego (u ime Kluba vijećnika S BiH)** pokrenuo je slijedeću inicijativu:

7/27. Na zahtjev stanovnika ulice Gornja Jošanica - Radića potok pokrećem inicijativu da se pokrene postupak sanacije puta u navedenoj ulici koji je oštećen prilikom izvođenja radova priključenju na kanizacionu mrežu.

Obrazloženje:

Naime nakon završetka navedenih radova asfaltni sloj na mjestima intervencije nije vraćen u prvobitno stanje, tim je putna površina ostala neuređena, što otežava svakodnevno kretanje vozilima i pješacima, a što može dovesti do ubrzanog daljnjeg propadanja saobraćajnice. Molimo vas da se izvrši uvid u stanje na terenu te planira i realizuje sanacija saobraćajnice u cilju vraćanja ulice u uredno i sigurno stanje. Ulica G. Jošanica – Radića Potok koristi se svakodnevno od strane lokalnog stanovništva, te bi sanacija doprinijela sigurnosti i kvaliteti života građana.

Vijećnik **Hebib Armin (u ime Kluba vijećnika SDP)** pokrenuo je slijedeće inicijative:

7/28. Pokrećem inicijativu za izradu javnog registra poslovnih i stambenih prostora u vlasništvu Općine Vogošća.

Obrazloženje:

U cilju jačanja transparentnosti, odgovornog upravljanja i participacije građana u lokalnoj zajednici, podnosim inicijativu za izradu javnog registra poslovnih i stambenih prostora u vlasništvu Općine Vogošća. Javni registar je model otvorenih podataka koji omogućava građanima, investitorima i institucijama jednostavan, transparentan i javan uvid u sve stambene i poslovne jedinice koje su u vlasništvu ili pod upravom Općine, u skladu sa zakonom o pristupu informacijama. Prednosti uvođenja javnog registra:

1. Transparentnost i povjerenje građana

Građani dobijaju pristup informacijama koje se tiču upravljanja javnom imovinom – što jača povjerenje i omogućava konstruktivnu participaciju u donošenju odluka.

2. Podrška razvoju lokalne ekonomije

Investitori i preduzetnici će imati jasan pregled dostupnih poslovnih prostora, što može olakšati ulaganja i doprinijeti razvoju lokalne ekonomije.

3. Efikasno i pametno upravljanje imovinom

Precizna evidencija olakšava upravljanje općinskim prostorima, identifikaciju neiskorištenih kapaciteta i planiranje prenamjena, zakupa ili sanacija, te može rezultirati povećanjem prihoda za budžet Općine.

Prema dostupnim informacijama sa kojima raspolažem, Služba za geodetske, imovinsko-pravne poslove i katastar nekretnina je 2017. godine izradila internu bazu podataka o općinskim nekretninama. Također, postoje započete aktivnosti na objedinjavanju prostornih podataka u jedinstvenu internu bazu. Općina već posjeduje tehničke i informatičke kapacitete – uključujući servere, lokalne mreže i moderniziranu web stranicu – što omogućava tehničku realizaciju registra i njegovu dostupnost javnosti. Više općina u Kantonu Sarajevo već imaju javno dostupne registre svojih nekretnina. Općina Vogošća, koja već ima osnovne tehničke i kadrovske pretpostavke, nema nijedan racionalan razlog da ne slijedi ovu praksu. Uvođenje javnog registra nije samo administrativna mjera, već strateški alat za unapređenje upravljanja javnim dobrima, jačanje povjerenja između institucija i građana, te poticaj lokalnom razvoju. Zato predlažem da Općinsko vijeće razmotri i podrži ovu inicijativu, te da se zaduže nadležne službe za njenu izradu i implementaciju u najkraćem mogućem roku.

7/29. Pokrećem inicijativu za postavljanje parkovskih klupa ispred stambenih objekata u ulici 24. juna, na brojevima 18A, 18B, 18C i 18D, u naselju Rosulje.

Obrazloženje:

U ulici 24. juna, u naselju Rosulje, izgrađen je novi stambeni kompleks (brojevi 18A–18D) u kojem živi značajan broj penzionera i osoba treće životne dobi. Upravo zbog strukture stanovništva, ali i potrebe za javnim prostorima za odmor i boravak na otvorenom, podnosim inicijativu za postavljanje parkovskih klupa ispred navedenih ulaza. Za razliku od drugih dijelova naselja Rosulje, gdje su ovakve klupe već postavljene ispred stambenih zgrada, ovaj dio još uvijek nema slična rješenja, iako za to postoji pripremljen, uređen i funkcionalan prostor. Lokacija je sigurna, lako dostupna i već integrisana u okoliš, čime se stvaraju optimalni uslovi za postavljanje urbane opreme. Kome bi klupe koristile?

- Stanovnicima treće životne dobi – radi lakšeg boravka na otvorenom i odmora;
- Trudnicama i roditeljima s djecom – tokom svakodnevnih šetnji;
- Prolaznicima – jer se naselje koristi kao šetna zona;
- Cjelokupnoj zajednici – kroz unapređenje urbanog standarda i socijalne interakcije.

U prilogu ove inicijative dostavljam fotografije i oznake tačnih lokacija na kojima se predlaže postavljanje klupa, koje jasno prikazuju prostornu dostupnost i funkcionalnost predviđenih pozicija. Pozivam nadležne službe Općine da u okviru svojih nadležnosti i planova za uređenje javnih površina razmotre ovu inicijativu, te navedene lokacije uključe u naredne aktivnosti postavljanja urbane opreme. Zahvaljujem se na razumijevanju i očekujem pozitivan odgovor u interesu svih stanovnika ovog dijela naselja Rosulje.

Vijećnik **Turković Faruk (u ime Kluba vijećnika SDA)** pokrenuo je slijedeću inicijativu:

7/30. Pokrećem inicijativu prema Direkciji BH Telecoma Sarajevo sa zahtjevom da se prošire signalni kapaciteti i izgrade bazne stanice na Kobiljoj Glavi, u podnožju brda Hum i Orlić, kao i na drugim ključnim lokacijama. Cilj: Omogućiti stabilan i kvalitetan mobilni signal u svim naseljima Općine Vogošća.

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir